

Ghali Mno—Lakini ni Bure

Kadhalika kwa tendo moja la haki watu wote walihesabiwa haki yenye uzima.
Warumi 5:18.

Pesa haiwezi kuinunua, akili haiwezi kuielewa, nguvu haiwezi kuiamuru; lakini kwa wote watakaoikubali, neema tukufu ya Mungu hutolewa bure. Lakini watu wanaweza kuhisi uhitaji wao, huku wakiacha kujitegemea, wakaukubali wokovu kama zawadi. Wale watakaoingia mbinguni hawatapanda kuta zake kwa haki yao wenyewe, wala malango yake hayatafunguliwa kwao kwa sababu ya matoleo ya gharama kubwa ya dhahabu au fedha, bali watapata kibali cha kuingia kwenye makao mengi katika nyumba ya Baba kupitia stahili za msalaba wa Kristo.

Kwa wanadamu wenye dhambi, faraja kubwa kabisa, sababu kubwa kabisa ya kufurahi, ni kwamba Mbingu imemtoa Yesu kuwa Mwokozi wa mwenye dhambi. ... Alijitoa kutembea kupita katika ardhi ile ambayo Adamu alijikwaa na kuanguka; kukabiliana na mjaribu kwenye uwanja wa vita na kumshinda kwa niaba ya mwanadamu. Mtazame katika jangwa la majaribu. Mchana arubaini na usiku arubaini alifunga, akistahimili mashambulio makali mno ya nguvu za giza. Alilikanyaga “shinikizo la divai peke Yake; wala katika watu hapakuwapo mtu pamoja” Naye (Isaya 63:3). Haikuwa ni kwa ajili Yake Mwenyewe, bali ili apate kuuvunja mnyororo ule ulioishikilia jamii ya wanadamu katika utumwa wa Shetani.

Kama Kristo katika ubinadamu Wake alivyotafuta nguvu kutoka kwa Baba Yake, ili apate kuwezesha kustahimili majaribio na majaribu, ndivyo na sisi tunavyopaswa kufanya. Tunapaswa kufuata mfano wa Mwana wa Mungu asiye na dhambi. Kila siku tunahitaji msaada na neema na nguvu kutoka katika Chanzo cha nguvu zote. Tunapaswa kuziweka nafsi zetu dhaifu juu ya Yeye aliye tayari kutusaidia katika kila wakati wa uhitaji. Mara nyingi sana tunamsahau Bwana. Nafsi hutoa nafasi kwa mihemko nasi tunapoteza ushindi ule ambao tulipaswa kuupata.

Pale tunaposhindwa hebu tusichelewe kutubu na kuukubali msamaha ule ambao utatuweka katika mahali panapofaa kuyakinga mashambulio. Pale tunapotubu na kuamini, nguvu ya utakaso kutoka kwa Mungu itakuwa yetu. Neema Yake inayookoa inatolewa bure. Msamaha Wake hutolewa kwa wote watakaokubali kuupokea ... Kwa ajili ya kila mwenye dhambi anayetubu malaika wa Mungu hufurahi kwa nyimbo za furaha. Hakuna mwenye dhambi hata mmoja anayepaswa kupotea. Zawadi ya neema inayookoa ni kamilifu na bure.